


von Wulf Wager

Knoblauchterrorisch!



Letzschd Woch war i en Reutlenga. Ond weil i bis zu meim Termin no a bissle Zeit ghet han und mi spontan dr kloine, mental nicht überwindbare Hongr übrfalla hot, han i mi ganz em Gegasatz zu meine sonscht eher schwäbisch-gediegene Ernährongsgewohnheita drzua entschlossa, bei so ma griechische Gyroslada so en aufgeschnittana Brotflada mit

kloine Floischbreggl zom essa. Der griechische Speisabe-reiter hot mi gfrogd "Mit allem?" "Noi, mit Messer ond Gabel!", han i ihm engegaghalta, aber er hot mi bloß humorlos a'grinst. "Mit allem" war aber mit Kraut, Salat, scharf ond vor allem mit Tzaziki. Tzaziki kennat Sie? Des isch die Rache der Griechen an Merkel und alle Deutsche. Leider han i mir do vorher koine Gedanka drzua gmacht ond des griechische Fast-Food mit Appetit gessa. Wo i des aber gschnallt han, wia scharf des Zaziki nochbrennt, war's scho z' spät! Dieser griechich-reutlingerische Knoblauchterrorischt hot so zemlich da ganza Knoblauchvorrat der weschtliche Hemisphäre in seim Tzaziki verarbeitet ghet. Drhoim a'komma, han i sofort im Internet guckt, was mr gega Knoblauchgeruch doa ka: Kaffebohna essa, Milch trenka, Schoklad essa ... Aber außer ma zemlich saura Magma, ond ra deshalb schloflosa Nacht für mi, hot des nix brocht. Au mei Frau hot a zemlich schloflose Nacht hendr sich, weil se nämlich die scharfe Knoblauchdünscht en dr Nacht schier om da Vrstand brocht hend. Am Morga hot se raote Auga g'het wia a Kielhas'.

Gsait hot se nix, aber i ben sicher, dass se sich heimlich überlegt hot, ob se net ins Gäschtezemmer goht. Ond des war auch dr heimlich-perfide Plan von sellem griechische Knoblauchterrorishta: Der will ons Deutsche durch Knoblauchdezimierung ausrotta. Aber net mit ons. Des Thema isch gessa!

Bis näggschd Woch'

Ihr

Wulf Wager